



# মার্কিন বার্তা

AMERICAN CENTER 38-A, Jawaharlal Nehru Road, Calcutta 700 071  
Tel: 2288-1200 (7 Lines) Fax: 033-2288-1616/9460 E-mail: pacal@state.gov

বিশেষ সংবাদ

৯ আগস্ট ২০০৪

## পড়াশুনার প্রতি শিশুদের আগ্রহ বাড়াতে আসছে বিশ্বমানের নতুন টিভি ধারাবাহিক

নয়াদিলি— ভারতীয় শিশুদের জন্য টেলিভিশনে বিশ্বমানের এক আকর্ষণীয় শিক্ষামূলক অনুষ্ঠানের সূচনা হতে চলেছে। যে সব শিশু এখনও স্কুলের দোরগোড়ায় পৌঁছোয়ানি তারা যাতে হেসে-খেলে চারপাশের সব কিছু শিখে ধীরে ধীরে বড় হয়ে উঠতে পারে সেজন্য ‘এলমো,’ ‘কুকি,’ ‘বার্ট’ ও ‘আর্নি’র মতো মজার মজার নানান পুতুল চরিত্র খুব শীঘ্ৰই বাচ্চাদের মন মাতাতে হাজির হবে টেলিভিশনের পর্দায়। কেনও বিদেশি ঢঙে নয়, দুনিয়ার শিশুদের কাছে দারকন প্রিয় ওই চরিত্রগুলিই এসে যাবে নতুন কোনও ভারতীয় নামে আর একেবারে দেশীয় রীতিতে গল্প বলার কায়দায়। মূলত টিভি ও ফিল্মে দেখানোর জন্য জিম হেনসনের সৃষ্ট এই মজাদার ‘স্টাফড টের’গুলিকে বলে ‘মাপেটস’। আর বাচ্চাদের কাছে এই মাপেটগুলি দুনিয়াজোড়া জনপ্রিয়তা পেয়েছে অলাভজনক মার্কিন শিক্ষা প্রতিষ্ঠান ‘সিসেম ওয়ার্কশপ’ প্রযোজিত টিভি ধারাবাহিক ‘সিসেম স্ট্রিট’ অনুষ্ঠানের গুণে। এবার আন্তর্জাতিক উন্নয়ন সংক্রান্ত মার্কিন সংস্থা (ইউএসএআইডি) এই অনুষ্ঠানের ভারতীয় রূপান্তরের জন্য ‘সিসেম ওয়ার্কশপ’কে দিচ্ছে পাঁচ লক্ষ ডলারের অনুদান।

‘সিসেম ওয়ার্কশপ’ পুরো অনুষ্ঠানটি ভারতীয় শিশুদের -- বিশেষত গ্রামের শিশুরাও যাতে তা থেকে আনন্দ পেতে পারে -- বোঝার মতো করে পুরোপুরি দেশীয় ধাঁচে ঢেলে সাজাবে। ছোটো ছোটো বিষয়কে বাচ্চাদের মনের মতো করে বুঝিয়ে দেওয়া, তাদের কল্পনা শক্তিকে ডানা মেলতে উৎসাহিত করা, নিরপেক্ষ ভাবে শিশুদের চিন্তা করতে এবং চারপাশের বৈচিত্র্যকে তারিফ করতে শেখানোরও নানান কৌশল থাকবে সমগ্র অনুষ্ঠান ভাবনায়। সব মিলিয়ে বাচ্চাদের প্রথম স্কুলে যাওয়ার জন্য তৈরি করে দিতে সাহায্য করবে এই অনুষ্ঠান।

সংস্থার প্রেসিডেন্ট ও সিইও গ্যারি ও নেল বলেছেন, “ভারতে এই উদ্যোগের সূচনা করতে পেরে আমরা রোমাঞ্চিত। সিসেম ওয়ার্কশপের লক্ষ্যই হল, পড়াশুনার বিভিন্ন বিষয়ের প্রতি বাচ্চাদের আগ্রহ বাড়িয়ে তোলা।” বিশেষত গ্রামাঞ্চলের শিশু এবং যে সব ছোটো ছেলেমেয়ের টেলিভিশন দেখার সুযোগ নেই তাদের কাছেও পৌঁছে যাওয়ার এক বিশেষ উদ্যোগ নেওয়া হবে এই অনুষ্ঠানে। ন্যাশনাল নেটওয়ার্ক

ও কেবল টেলিভিশনের মাধ্যমে সম্প্রসারণ ছাড়াও এই অনুষ্ঠান যাতে রেডিওতেও শোনা যায় তারও ব্যবস্থা করা হচ্ছে। এছাড়াও অনুষ্ঠানের প্রধান প্রধান বিষয়গুলির বার্তা সকলের কাছে আরও ভাল ভাবে পৌঁছে দিতে সেগুলির ছাপানো ও ভিডিও রূপান্তরও প্রস্তুত করা হবে। তাৎপর্যপূর্ণ ব্যাপার হল, এই ধরনের অনুষ্ঠানের মাধ্যমে মেরেদের ক্ষুলে যেতে উৎসাহিত করা হবে এবং তারা যাতে ছেলেদের সমান ব্যবহার পায় সে ব্যাপারে সচেতনতা প্রসারণও চেষ্টা করা হবে।

ভারত সরকার ঘোষিত “সকলের জন্য প্রাথমিক শিক্ষা”র উদ্দেশ্য পূরণের সঙ্গে সামঞ্জস্য ঘটাতে সিসেম ওয়ার্কশপকে দেওয়া ইউএসএআইডি’র সহায়তার মাধ্যমে প্রস্তাবিত ধারাবাহিক অনুষ্ঠানে অত্যাধুনিক মিডিয়া টেকনোলজির সৃজনশীল ব্যবহার ঘটানো হবে। অনুষ্ঠানের বিষয়বস্তু পরিকল্পনায় সাহায্য নেওয়া হবে ভারতীয় শিক্ষাবিদ, অনুষ্ঠান প্রযোজক এবং শিশু বিশেষজ্ঞদের। মিশন ও দক্ষিণ আফ্রিকা সহ ২০টিরও বেশি উন্নয়নশীল দেশে এই অনুষ্ঠান যথেষ্ট সফল হয়েছে। সেখানকার প্রযোজনীয় অভিজ্ঞতাও এক্ষেত্রে কাজে লাগানো হবে। এই প্রয়াসে শামিল করা হবে বিভিন্ন কর্পোরেট সংস্থা, এনজিও এবং অন্যান্য সংগঠনকেও।

\*\*\*\*\*

**দ্রষ্টব্য:** এই নিবন্ধের সম্পূর্ণ ইংরেজি ভাষ্য আমেরিকান সেন্টারে পাওয়া যাবে। আপনি যদি মূল ইংরেজি বয়ানটি পেতে চান তাহলে আমেরিকান সেন্টারের প্রেস সেকশনে (টেলিফোন: ২২৮৮ ১২০০-০৬, ফ্যাক্স: ২২৮৮ ১৬১৬; ই-মেল: [pascal@state.gov](mailto:pascal@state.gov)) যোগাযোগ করতে পারেন।